

PRENTSAURREKOA

‘INDARKERIARI ZILEGITASUNA KENDU’ AGIRIAREN AURKEZPENA

Azken urteetan, Bakearen aldeko Koordinakundeak, ETAren terrorismoaren bukaera behin eta berriz exijitzeaz gain, funtsezko bi oinarri nabarmendu izan ditu, arazo larri honi aurre egiteko, hala nola:

- Indarkeriari zilegitasuna kendu.
- Indarkeriaren biktimen aldeko elkartasuna eta aitorpena.

Prentsaurreko honetan, bi oinarri horietako lehenengoari buruz eratu dugun agiria aurkeztu nahi dugu, ETAren gaitzespenetik haratago doan kontzeptu eta jarrera islatzen duen printzipioari buruzkoa hain zuzen: **indarkeriari zilegitasuna kendu**. Idazki honetan, indarkeriari zilegitasuna kentzea ezinbestekoa dela aldarrikatzeko funtsezko arrazoiak aurkeztu ditugu eta horrek jardueran zer esan nahi duen garatu dugu.

Gure ustez, nahitaezkoa da indarkeria terroristari oinarri sendoetatik aurka egitea; oinarriok, lehenengo eta behin, gaur egun basakeria honi aurre egitea ahalbideratu behar dute baina, aldi berean, oinarri demokratikoen, giza eskubideen eta euskal gizartearen aniztasuna bera bermatu behar dituzte uneoro.

Oinarri sendo horien jatorrian, gure ikuspuntutik, indarkeriari zilegitasuna kentze hori nork bere egitea eta defendatzea dago eta horrek, erakundeen, alderdi politikoen eta, orokorrean, gizartearen eguneroko jardunean eragina duten jarrera batzuk eskatzen ditu.

Hauek liriateke jarrerok:

- **Gizarteak bere egin behar du indarkeriaren aurkako gaitzespen morala.** Ezinbestekotzat jotzen dugu gizarteak, desberdintasun ideologikoak alde batera utzita, indarkeria terrorista erabiltzeko arrazoi eta justifikaziorik ez dela egon onar eta defenda dezala eta, ondorioz, biziaren eta giza eskubideen erabateko defentsa egin dezala
- **Gizarteak, bere erakunde eta indar politikoak buru dituela, indarkeriaren biktimen aldeko aitorpen, elkartasun eta oroipenean irmotasunez konprometitu behar du.** Guretzat, lehentasuna du gizarteak indarkeriaren biktimak gizarte osoaren aurkakoa zen eraso zuzenean jasan duten auzokideak ditugula aitortzeak, ETAk ez dituelako bere helburuak direnagatik aukeratu, bizi diren gizartearentzat adierazten dutenagatik baizik.
- **Gizarte eta politika testuinguruari lotutako indarkeriaren edozein aitzakiari irmotasunez uko egin behar diogu.** Indarkeriari zilegitasuna kentzeak zera eragin behar du: indarkeriaren eta gizarte honetan Euskal Herriarekin identifikatzeko era desberdinetatik sortzen den arazo politikoaren artean kausazko lokarria ezarri nahi dutenei indar moral eta politikoa kentzea. Gaur egungo gizarte eta politika

COORDINADORA GESTO POR LA PAZ DE EUSKAL HERRIA
EUSKAL HERRIKO BAKEAREN ALDEKO KOORDINAKUNDEA

egoeran, inolako giza sufrimendu, frustrazio edo antsia politikorik ezin dezake indarkeria beste auzokide batzuen aurka erabiltzea babestu edo justifikatu. Gatazka bakar batek ere ez gaitu nahitaez indarkeria erabiltzera bultzatzen bera konpontzeko. Beraz, terrorismoa, berez, ez dela mehatxua, indarkeriaren mehatxuaren behin-betiko desagertpenaren truke ordaindu behar dugun prezioa konponbidetzat duen auzi politikoaren isla baizik jasotzen dueneko argumentua baztertu egin behar dugu. Ezinbestekoa da indarkeria tresna politiko bezala ez justifikatzea, ez arrazoitzea, ez zuritzea..., eta bere erabilera okerreko erabakiaren fruitutzat agertzera ematea.

- **Ondorioz, indarkeriaren eta politikaren arteko balizko lotura behin-betiko desegin behar dugu**

Ez dago nahitaezko loturarik ETAREN indarkeriaren eta arazo politiko bakar baten artean. Arazo politikoak egoteak ez du eragiten, nahitaez, ETAREN indarkeria. ETAREN indarkeria, arazo politiko horiei buruz eta berauek konpontzeko moduari buruz ikuspuntu jakin bat duten pertsonentzat baizik ez da beharrezkoa. Hau da, terrorismoa, Euskal Herriko egoeraren ikuspuntu jakin baten oinarrituta bihurtzen da borrokarako tresna.

Honen haritik, gure etorkizunaren inguruko erabaki politikoak erabat bereiztu behar dira indarkeriaren mehatxu eta txantajetik eta indarkeria erabiltzeari uko egitetik. Indarkeria darabiltenek, horren bitartez ez dituztela beren helburuak lortuko ikusi behar dute. Legez kontrakoa litzateke indarkeria uzteagatik ordain politikoak ematea.

Gainera, gure etorkizunari buruzko eztabaida politikoei ekiterakoan, argi eta garbi adierazi behar dugu ondorengo hau: ETAREN indarkeriak eta bere mehatxuak zailtasun itzelak dakartzala askatasunean eta aukera berdinetan politika normalizatua egiteko, batez ere nazionalistak ez diren alderdientzat. Era berean, ETA egoteak ez luke gure etorkizun politikoari buruzko eztabaida gelditu behar. Beraz, bi baieztapen hauek –politika egin indarkeria egon arren eta ETAK ez dezala politika zuzendu- uztartzeak, gure gizartearen etorkizun politikoari buruzko edozein proposamen esanguratsu lantzerakoan indarkeriarik gabeko egoeretan baino bidezko adostasun handiagoak bilatzera bultzatzen gaitu.

- **Aniztasunetik bizikidetasun baketsua gauzatzearen alde jardun behar dugu.** Eraso terrorista, aniztasunaren ezeztapena da, gizarte horretako kideek beren nortasunaren inguruan dituzten ikuskera desberdinen gutxieneko errespeturik gabe. Era bateko zein besteko egitismo politikoek erabateko errespetua erakutsi behar diote dagoen aniztasunari. Euskal Herria eta Nafarroa gizarte plural bezala eratu izan dira kultura eta politika mailan. Euskal Herriaz hitz egitea, ezin ukatzeko aniztasuna erakusten duen giza errealitateaz jardutea da. Errealitate anitz hau, zoritxarrez men egin behar diogun egoera bezala ez ezik, giza aberastasunerako aparteko aukera bezala aitortzea eta onartzea ezinbesteko baldintza da geroa bake eta askatasunean eraikitzeko.
- **Terrorismoaren aurkako borrokak zehatz-mehatz errespetatu behar ditu legeria eta giza eskubideak.** Indarkeriaz jantzitako hainbeste urtek eragindako gogaitasun eta amorruek ezin gaituzte, egundoko izu honi aurre egiteko eraginkortasunaren eta ahalik eta bizkorren deuseztatzearen mesedetan, ETAREN aurka denak balio duela

**COORDINADORA GESTO POR LA PAZ DE EUSKAL HERRIA
EUSKAL HERRIKO BAKEAREN ALDEKO KOORDINAKUNDEA**

pentsatzera eraman. Zuzenbidezko estatuaren erabateko defentsa egin behar dugu, eta giza eskubideak eta eskubide demokratikoak gizaki bakar baten aurka ere murriztu ez daitezzen ahalegindu.

Adierazpen askatasunaren aurkako eta partehartze politikoa arautzeko jarduera judzialen oinarriek sendoak izan behar dute eta delitua egotearen frogei erantzun behar diete. Honen haritik, ez dugu onartzen garrantzi handiko kautelazko neurririk ezartzea, praktikan behin-betiko eta atzeraezinak direlako.

Ondorioak

Hauxe da Bakearen aldeko Koordinakundearentzat 'indarkeriari zilegitasuna kendu' delakoak adiearazten duena. Ez da abagune jakin bati erantzuten dion azterketa. Hogei urtetik gorako lanak eragindako gogoeta eta esperientziaren emaitza da.

Terrorismoaren arazoari **esparru 'pre-partidistatik'** aurre egin behar diogu: terrorismoaren aurka batera jardutea ekarriko duen oinarrizko printzipio batzuk geure egin eta terrorismoaren arazoari alderdi baten edo bestearen mesedetan erabiltzeari uko egin. Indarkeriari zilegitasuna kentzea eta honek dakarren guztia da funtsezko printzipio horietako bat.

Une honetan egin dezakegun ekarpenik onena dela pentsatuz eskaintzen diogu agiri hau gizarteari. Alderdi politiko eta sindikatuei bidali diegu, eta udaren ostean, alderdiekin harremanetan jarriko gara, idazki honi buruz duten iritzia jasotzeko.

Gure ustez, orain, ahalegin handiagoa egin behar dugu, oinarrizko printzipio batzuk geure egin eta esparru baterako eta bateratu hori finkatzeko, terrorismoari aurre egin eta indarkeriaren arazoa eta gatazka politikoak argi eta garbi bereizteko. Hauxe da gure eskaririk nagusienetakoa eta horren alde lanean jarraituko dugu.

COORDINADORA GESTO POR LA PAZ DE EUSKAL HERRIA
EUSKAL HERRIKO BAKEAREN ALDEKO KOORDINAKUNDEA

2008.eko uztailaren 19a

